



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguintas fatschendas:

Chanalisaziun privata Liuns

Il cumün surpiglia sainza indemnizaziun üna chanalisaziun privata sü Liuns. Vi da quista lingia sun tachadas 8 chasas. Il cussagl decida da surtour al listess mumaint la via d'access chi'd es in ün nosch stadi, eir quella sainza indemnizaziun, cull'intenziun da far las lavuors da sanaziun necessarias.

Parkegi suotterran Hotel Conrad

La famiglia Gianotti sco proprietaria da l'hotel Conrad fa la dumonda da princip a reg. üna garascha suotterrana sper l'hotel, suot il terrain cumünal dasper la Chasa du Parc. Il cussagl salüda quist intent, siond cha la situaziun actuala dals parkegis in quel quartier nu cuntainta.

Strasora Val S-charl

Quista stà, specialmaing als 6 avuost, ma eir davo, haja dat ferms temporals. Quels han chaschunà diversas boudas chi'd han bloccà la via da S-charl. Ils cuosts per la rumida s'amuntan a ca. CHF 80'000.-- (lavor dals impiegats cumünals e da firmas externas). Quist evenimaint dà andit da discuter dumondas da sgürezza in connex cun quista via.

Via da Prui

La via da Prui sto gnir sanada. Las lavuors vegnan subvenziunadas per ca. 60 %, tuot tenor il proget chi's tschernà. Üna part dals cuosts restants avess d'ir eir a charg dal cumün da Scuol. Il scumpart nun es amo cuntschaint. Important esa cha la via possa gnir dovrada per las fabricas da las Pendicularas sülla Motta e sü Prui.

Proget Chaschiners (areal Engadinerhof)

Il cussagl discuta in plüssas sezzüdas las prescripziuns dal plan da quartier e fa singulas completaziuns. El decida plünavant masüras per promover l'hotel sün quist areal, schliгерimaints chi sun gnüts concess eir pro oters progets d'hotellaria in cumün (p.ex. relaschar la taxa pel permiss da fabrica e dar la pussibilità da pagar las taxas d'attach in ratas infra 10 ons).

Important esa pro quist proget d'avair la garanzia chi vegna eir fabrichà l'hotel dasper las abitaziuns. Las trattativas cuntinuan.

Plan da quartier Pütvia-Sotchà

Il cussagl decida d'introdüer il plan da quartier Pütvia-Sotchà. L'introducziun vain fatta a savair directamaing als pertocs.

Chanalizaziun Plai

In connex culla chanalizaziun sun da trar avant sün quist on diversas lavuors. La part in redschia vain fatta da la firma Foffa + Conrad SA, pel rest daja üna submitziun. La finanziaziun succeda il rom dal büdschet d'investiziuns.

Disco Sounds

Il cussagl admetta al BES da tour sü trattativas per üna prolungaziun dal contrat da fitanza pella disco fin la fin da la stagiun d'inviern 2008/2009. Las cundiziuns cuntschaintas (uorden, canera, protecziun da la giuventüna) ston gnir manzunadas il contrat cun insistenza, e'ls manaders da gestiun ston svesa eir pisserar per uorden e quietezza il's cuntuorns.

Di dal god

Il di dal god als 23 avuost 2008 es gnü frequentà da ca. 40 persunas. Da la partida d'eiran eir bliers proprietaris da seguondas abitaziuns. Als organisatuors, Gian Cla Feuerstein e Reto Caviezel, pertocca ün sincer ingrazchamaint per quist di interessant.

Arrandschamaint seguondas abitaziuns

L'inscunter d'infuormaziun e da discussiun per proprietaris da seguondas abitaziuns dals 22 avuost 2008 ha gnü ün bun rebomb. La gliעד predscha la pussibilità da survgnir infuormaziuns directas e d'avair contact eir tanter pêr.

Senda d'aventüra da l'uors aint in S-charl

Il proget per üna senda da l'uors es gnü elavurà cumünaivelmaing dal WWF, da Scuol Turissem e dal Parc Naziunal. Il cumün es pront da spordscher man pella construcziun da la senda e da güdar a pisserar pels permiss necessaris. La realisaziun es previssa da prümavaira 2009.

Schmelzra

Il cussagl cumünal es pront da contribuir ün import da CHF 50'000.-- per las lavuors da sanaziun vi da la Schmelzra aint in S-charl (sgürar las müraglias). Quai vain fat seguaintamaing: cun relaschar l'impraist vegl da CHF 40'000.-- e cun pagar duos jadas CHF 5'000.-- (2009 e 2010).

Pendicularas Motta Naluns

Il cussagl deliberescha definitivmaing il credit da CHF 500'000.-- per l'augment dal capital d'acziar da las Pendicularas. La cumünanza d'urna ha approvà als 4 mai 2008 quist credit our dal fuond da rechav da terrain. Siond cha'l chapital necessari per la nouva pendiculara d'access es gnü raggiunt fingià sainza la contribuziun dal cumün serva quist import ad ün seguond augment chi fa dabsögn per las investiziuns da l'on 2010 (impüstüt per la nouva s-chabellera Ftan - Prui).

Sco surpraisa positiva ha il cussagl cumünal pudü constatar cha la "Silvretta Bergbahnen AG" dad Ischgl ha declerà da segnar acziar illa valor da CHF 500'000.-- sainza cundiziuns.

Pendicularas: garanzia pels credits d'investiziun

Las Pendicularas han la pussibilità da survgnir credits d'investiziun ed üna contribuziun a fond perdu pels progets ch'ellas vöglian realisar dal 2009 e 2010. Il Chantun e la Confederaziun pretendan però dals cumüns üna garanzia correspondent. Ils cumüns da Ftan e Sent han miss in vista da surtour minchün ün mez milliun, e Scuol sto decider davart üna süertà d'ün milliun. Il cussagl deliberescha la dumonda in quist sen a man da la radunanza d'infuormaziun dals 27 october 2008 ed a man da la votaziun a l'urna dals 30 november 2008.

Punt d'En Vulpera

Il cumün da Tarasp vaiva dumandà al cumün da Scuol sch'el füss d'accord da realisar ün marchapè lung la via d'Engiadina tanter la Punt d'En Vulpera e l'imboccadüra da la via da Tarasp/Cuttüraplana e da surtour cuosts ill'otezza da CHF 70'000.--. Il cussagl cumünal decida da gnir incunter a quist giavüsch cun tschertas cundiziuns: Ils cuosts nu das-chan surpassar ils CHF 70'000.--, il cumün da Tarasp sto surtour il mantegnimaint dal marchapè e pisserar pella rumida da naiv. Plünavant nu das-chan gnir serradas otras colliaziuns per peduns.

Plan da quartier Buorna

La convegna tanter trais proprietaris da terrain, l'ultima pendenza chi bloccaiva amo il proceder dal plan da quartier, es avant man. Il cussagl cumünal ha dimena pudü approvar il plan da quartier. Quai vain dat cuntshaint directamaing als pertocs.

Plazza da ballapè

Per cumbatter l'uschèdit "Engerling" esa stat necessari da squittar tössi sülla piazza.

Surdattas da lavuors

Val Chalzina

Il cussagl surdà tenor proposta da l'uffizi forestal dal Grischun meridional las lavuors resp. furniziuns pels repars aint in Val Chalzina.

Lavuors specialas d'impresari: Eberle, Tavo

Furniziun da raits: Geobruugg AG, Romanshorn

Dumondas da fabrica

Il cussagl resp. la direcziun han dat ils seguaints permiss da fabrica:

- a l'Action Biblique per ün ingrondimaint da la Chasa Plan Grond giò Pradella
- als fradgliuns Seraina Riatsch e Jon Andri Willy per ün annex vi da lur chasa süls Chomps, S-charl
- a Jachen Giston per fabricar intuorn la chasa nr. 209 in Clozza
- a l'Arredo GmbH per fabricar intuorn ed ingrondir il stabilimaint sün parc. 540 in Rachögna
- a Not Neuhäusler per renovaziuns e müdamaints da la chasa nr. 174 in Bagnera
- a Mario Defilla e Daniel Malgiaritta per 5 chasas da vacanzas sün parcella 2050 in Quadras
- a l'Administraziun federala da duana per ün'antenna da comunicaziun aint il God Pradatsch, Val S-charl (resalv il permiss da l'Uffizi chantunal pel svilup dal territori per fabricats dadour la zona da fabrica)
- a l'Arena Tech per sbodar la chasa sün parcella 2128 (chasa Lys)
- a l'Arena Tech per ün annex temporar pro la chasa IES in Bagnera
- a Christian Rainer per ün annex (zona da wellness cun bogn cuvernà) vi da l'hotel Bellaval
- a Seraina e Markus Gurtner-Canal per üna chasa d'abitar sün parc. 1224 in Sotchà Dadora
- a Kurt Baumgartner per la renovaziun da l'hotel Guardaval
- per implants solars e sondas geotermicas in divers lös

A l'Arena Tech es gnü dat ün permiss excepziunal da cumanzar cullas lavuors da sbodamaint (chasa Lys) e cullas perforaziuns pels ancoragis fingià als 1. october.

Scuol, 10 october 2008

Il cussagl cumünal